



PERSEVERA

Un página di kurashámentu i guia spiritual pa miembronan di Scouting Antiano



Mei 2012

Edishon 16 Aña 2

Siman di Famia

Famia....

Famia ta forma komunidad. Ke men, ku famia sano ta garantia pa un komunidad salu. Papa Huan Pablo II mes ta bisa ku: Famia ta bini di Dios, pasobra Dios den su sabiduria a instituí famia. El a krea dos hende, un hòmer i un muhé i El a duna nan e tarea di bai forma un famia. P'esei no tin mihó lugá pa forma hende ku den un famia. Ta aki nos ta lanta, sera konosí i siña biba e balornan di mas grandi di bida; esta amor, responsabilidad, dedikashon, pasenshi, kurashi i komprehshon di un pa otro.

I ta nèt esakinan ta e balornan, ku nos mester fomentá òf trese bek den nos famianan di awendia. Famianan den kua ta stima otro, ta kuida otro i prinsipalmente ta resa ku otro. I si nos logra trese e balornan aki bek den nos komunidad, lo ta sigur un bendishon pa nos pais.



Mama i Tata Kristian

Mama i Tata Kristian kontinuamente ta demostrá nan yunan kon ta biba konvensé di Dios su amor ku no ta kaba nunca. Esei no ta nifiká, ku nos tin di

skonde pa nos yunan, ku nos tambe sa faya.

Al kontrali.

Si nos ke sigui rekonosé nos mes den nos yunan, nos mester laga nan tuma nota di momentunan di tenshon i tentashon ku nos ta pasa aden. Pero laga nan eksperensha ademas ku nos amor, kurashi i konvikshon di fe, ta pone mama i tata lanta kabes atrobe i solushoná kualke problema. Ta esaki ta loke nos yunan mester mira i tende. Loke nan ta eksperenshá komo amor ankrá den fe. Ser mayor kristian ta praktiká amor i fe den union total ku yunan. Esei lo trese nos mas serka otro i mas serka e fuente, e Dunadó di tur loke ta bon.

Orashon pa Famia

Laga nos invoká Dios Tata, ku a krea famia pa e amor infinito ku E tin pa nos. Tata Santu, bendishoná tur famia di Kòrsou. Hasi yunan kada dia mas humilde, mas someté na nan mayornan, mas komprehensivo den nan trato pa ku otro, mas tolerante pa ku nan grandinan. Hasi pa e manera di biba di nos famianan kristian duna prueba ku nan ta stima otro di bèrdat. Aseptá benignamente nos kasnan di famia aki na Kòrsou, ku awor nos ta konsagrá henteramente na Bo. Esaki nos ta pidi Bo pa medio di Kristu nos Señor, ku ta biba i reina ku Bo den tur eternidat. Amèn

Santa Famia di Názaret, Hesus, Maria, i Hosé bendishoná nos famianan

Un mihó mundu mañan ku mas Famia Kristian
Tabata e lema di e bishita Papal na diótesis di Willemstad na Mei 1990